

20 HLAKOLA 2023

THUTO YA SEHOPOTSO SA NGK. KPD MAPHALLA LE DIJO TSA MANTSIBOYA

Ngk. Kgotso Pieter David Maphalla ya hlahetseng Bohlokong, Bethlehem ka la 25 Hlakola 1955, e ne e le monono wa dingolwa tsa Sesotho ya hlwahlwa. Mosebetsi wa hae o akaretsang mefuta ya dingolwa yohle, o ile wa hlophisetswa ho balwa dikolong le ho sebediswa ditheo tsa thuto e phahameng. Di bile di sebedisitsewe diphuphutsong tsa baithuti ba Mastase le Bongaka ba Filosofi (PhD) diyunivesithing.

K.P.D., e leng ka moo a neng a bitswa, o fumane ditlotlo tse mmalwa, ho kenyeletsa le tiholo ya Kgau ya Mopheti wa Selemo nakong eo e neng e le moithuti Kholejeng ya Thuto ya Tshiya ka 1976. O ile a tswela pele a hohola dikgau tse ding tse ngata tse kenyeletsang Radio Sesotho Astera, Kgau e Potolohang ya Thomas Mofolo hammoho le tlhompho ho tswa ho baphatlalatsi ba mmalwa. Ngk Maphalla o ile a fuwa dikgau tse mmalwa tsa katleho ya bophelo, ho kenyeletsa le Kgau ya MNet le ya Bodulasetulo ya Dikgau tsa Bongodi tsa Afrika Borwa.

Ka baka la boqhetseke ba hae ba ho ngola, Yunivesithi ya Freistata ka Lefapha la Dipuo tsa Afrika e ile ya tlotla Ngk Maphalla ka ho mo fa Bongaka ba Tlotlo ho tsa Dingolwa. Lefapha la Dipapadi, Bonono, Botjhaba le Boikgathollo le na le dipontsho tsa mosebetsi wa Ngk Maphalla tseo setjhaba se ka di bohlang Musiamong wa Dingolwa tsa Sesotho, Mangaung.

Ka Pudungwana 2021, President Cyril Ramaphosa o ile a nehela Tlotlo ya Ikhamanga ho Ngk Maphalla, ka mora lefu. Tlotlo ena e nehelwa baahi ba Afrika Borwa ba ipabotseng ho tsa bonono, botjhaba, bongodi, mmimo, boqolotsi kapa dipapadi. Mongodi eo ya hlwahlwa o hlokahetse ka la 05 Mmesa 2021 motseng wa ha habo, Bethlehem.

Lefapha la Dipapadi, Bonono, Botjhaba le Boikgathollo, ka kopanelo le Yunivesithi ya Freistata, le tla tshwara Thuto ya Sehopotso le Dijo tsa Mantsiboya ho hlompha qhoku ena. Profesa Nhlanhla

Maake, eo le yena e leng monono wa dingolwa, e tla ba sebui sa sehlooho moketeng. Profesa Maake o boetse e le mongodi wa padi, drama, mohlalobi wa dingolwa ekasitana le moitseki ho tsa dingolwa. O bile maemong a mmalwa ho tsa thuto ka hara naha ekasitana le lefatsheng ka bophara, mme o sebeditse le tse mmalwa tsa Dihlopha tsa Tshebetso ho tsa Puo ka tlasa Lefapha la Bonono le Botjhaba. O fane ka dipampiri le puo tsa sehlooho dibokeng tsa ka hara naha le tsa matjhaba. O phatlaladitse mefuta ya dingolwa ka bophara mme a hlola dikgau tse mmalwa tsa dingolwa.

Boraditaba ba memelwa thutong ya sehopotso e tla tshwarwa ka mokgwa o latelang:

LETSATSI: 24 Tihakola 2023

NAKO: 17:00 bakeng sa 18:00

SEBAKA: Odeion Auditorium (UFS Bloemfontein)

Linki: <https://www.facebook.com/UFSLibrary/>

Baeti bohle ba tla lebellwa ho tla le tokomane tsa bona tsa boitsebiso ho kena Yunivesithing.

E phatlaladitswe ke Lefapha la Dipapadi, Bonono, Botjhaba le Boikgathollo ka kopanelo le Yunivesithi ya Freistata.

Dipotso: Tankiso Zola

Molaodi: Dipuisano le Theknoloji ya Lesedi

Sele: 082 940 2392

Moh.: 051 – 410 4735/4786/4742

Imeili: tankiso@sacr.fs.gov.za